

佛門孝經

佛說盂蘭盆經講義

■ 圓瑛法師講義

佛尼牟迦釋師本無南



香赞

炉香乍热。法界蒙熏。诸佛海会悉遥闻。
随处结祥云。诚意方殷。诸佛现全身。
南无香云盖菩萨摩訶萨_{三称}

开经偈

无上甚深微妙法	百千万劫难遭遇
我今见闻得受持	愿解如来真实义

佛说盂兰盆经

西晋三藏竺法护译

闻如是。一时佛在舍卫国。祇树给孤独园。大目犍连始得六通。欲度父母。报乳哺之恩。即以道眼。观视世间。见其亡母。生饿鬼中。不见饮食。皮骨连立。目连悲哀。即以钵盛饭。往饷其母。母得钵饭。便以左手障钵。右手抆食。食未入口。化成火炭。遂不得食。目连大叫。悲号涕泣。驰还白佛。具陈如此。佛言。汝母罪根深结。非汝一人力所奈何。汝虽孝顺。声动天地。天神。地祇。邪魔外道道士。四天王神。亦不能奈何。当须十方众僧威神之力。乃得解脱。吾今当说救济之法。令一切难。皆离忧苦。佛告目连。十方众僧。七月十五日。僧自恣时。当为七世父母及现在父母。厄难中者。具饭百味五果。汲灌盆器。香油锭烛。床敷卧具。尽世甘美。以著盆中。供养十方大德众僧。当此之日。一切

圣众。或在山间禅定。或得四道果。或在树下经行或六通自在。教化声闻缘觉。或十地菩萨大人。权现比丘。在大众中。皆同一心。受钵和罗饭。具清静戒。圣众之道。其德汪洋。其有供养此等自恣僧者。现世父母六亲眷属。得出三涂之苦。应时解脱。衣食自然。若父母现在者。福乐百年。若七世父母生天。自在化生。入天华光。时佛敕十方众僧。皆先为施主家咒愿。愿七世父母。行禅定意。然后受食。初受食时。先安在佛前。塔寺中佛前。众僧咒愿竟。便自受食。时目连比丘。及大菩萨众。皆大欢喜。目连悲啼泣声。释然除灭。时目连母。即於是日。得脱一劫饿鬼之苦。目连复白佛言。弟子所生母。得蒙三宝功德之力。众僧威神之力故。若未来世。一切佛弟子。亦应奉盂兰盆。救度现在父母。乃至七世父母。可为尔不。佛言。大善。快问。我正欲说。汝今复问。善男子。若比丘比丘尼。国王太子。大臣宰相。三公百官。万民庶人。行慈孝者。皆应先为所

生现在父母。过去七世父母。於七月十五日。佛欢喜日。僧自恣日。以百味饭食。安盂兰盆中。施十方自恣僧。愿使现在父母。寿命百年无病。无一切苦恼之患。乃至七世父母。离饿鬼苦。生人天中。福乐无极。是佛弟子修孝顺者。应念念中。常忆父母。乃至七世父母。年年七月十五日。常以孝慈。忆所生父母。为作盂兰盆。施佛及僧。以报父母长养慈爱之恩。若一切佛弟子。应当奉持是法。时目连比丘。四辈弟子。欢喜奉行。

报父母恩咒——南无密栗多哆。婆曳娑诃。

赞——神通尊者。满钵呈亲。食才入口火炎身。号泣莫能伸。圣教敷陈。享荐伏慈尊。

上兰盆供

孟兰会启 普度门开 恭迎三宝降临来 一一坐华台
唯愿慈哀 受我妙香斋

南无斋供养菩萨摩訶萨^{三遍}

南无常住十方佛 南无常住十方法 南无常住十方僧

南无本师释迦牟尼佛 南无药师琉璃光佛 南无当来下

生弥勒尊佛 南无过去觉华定自在王佛 南无清净莲华
目佛 南无多宝如来 南无宝胜如来 南无妙色身如来
南无广博身如来 南无离怖畏如来 南无甘露王如来
南无阿弥陀如来 南无世间广大威德自在光明如来
南无佛说孟兰盆经 南无大愿地藏王菩萨 南无大悲观
世音菩萨 南无护法诸天菩萨 南无伽蓝圣众菩萨 南
无历代祖师菩萨 南无兰盆会上佛菩萨 南无古往自恣
缘觉声闻僧 南无大孝目犍连尊者 南无三界圣凡幽显
尊神三遍

南无萨嚩怛他俄哆 嚩嚩枳帝 唵 三跋啰三跋啰吽二
十一遍

南无苏噜婆耶 怛他俄哆耶 怛姪他 唵 苏噜苏噜钵
啰苏噜钵啰苏噜 娑婆诃七遍

此食色香味 上供十方佛 中供诸圣贤 下及六道品
等施无差别 随愿皆饱满 令今施者得 无量波罗密
三德六味 供佛及僧 法界有情 普同供养一遍

唵 俄俄曩 三婆缚 鞞日啰斛三遍

五果百味 香色清新 自恣会上献能仁 愿亲出沉沦
普济幽冥 沙界布阳春 南无普供养菩萨摩诃萨三遍

以此兰盆供善根 报答父母劬劳恩 存者福乐寿无
疆 亡者离苦得超生
四生九有诸含识 八难三途苦众生 各各悔过洗瑕
疵 尽蒙慈济出沉沦

自序

夫寄迹尘寰。铸形父母。怀胎十月。乳哺三年。咽

苦吐甘。谁无劬劳之德。移乾就湿。曷禁罔极之恩。古人有言曰。百行孝为先。立身孝为本。诚哉是言乎。尝闻於人曰。释氏割爱辞亲。毁形脱俗。斯诚不孝之徒。罪何可逭。余曰。子只知其孝之小者。而不知其孝之大也。举世皆然。何怪於子。以其但知今生父母。而不悉累生父母。今生父母。理宜尽孝。累世父母。可不行孝乎。然累世亲缘。改形易报。未了生死。不出轮回。我等既无宿命之通。何由得识。人间天上。此界他方。出没万端。升沉片刻。俄焉而天。俄焉而人。俄焉而修罗畜生。俄焉而饿鬼地狱。彼其呼号痛苦。宛转饥虚。我虽不见不闻。彼必求拯求救。其或鞭驴出血。谁知吾母之悲。牵豕就屠。焉识乃翁之痛。而释氏之出家修道。朝暮课诵。拔济三途。茹素终身。不忍杀食。若有道行。能令慈亲。了生脱死。离苦得乐。四恩总报。三有均资。其为孝也大。彼徒知甘旨之供。口体之养。其为孝也小。如我佛释迦牟尼。为太子时。因观我及众生。老病死苦。无法解决。一日於北花园晏坐。忽有净居天人。化现比丘。圆顶赤足。身披袈裟。手持锡杖从太子前徐步而过。威仪济济。道貌雍雍。太子见而异之。问曰。子为谁。所修何行。答曰。我乃比丘。修出离生老病死苦之行。太子心喜。欲请示修法。时比丘振锡。腾空而去。太子遂立志出家修道。夜半逾城。青山断发。弃舍金轮王位。现作比丘。脱珍御之服。著弊垢之衣。五载参方。六年苦行。时节既至。佛道堪成。故於腊八。夜睹明星。忽然悟道。世出世法。靡不了知。悟明生老病死。原由爱欲而生。因爱生欲。因欲受身。有身则老病死苦。相续不断。舍生趣生。穷劫莫脱。故佛制

比丘。严持禁戒。心身不淫。断除贪欲。苦因既断。苦果自无。此身不有。则老病死苦。不离而自离矣。本利生之弘愿。以先觉觉后觉。说法四十九年。度生无量数众。为报亲恩。上升忉利。为母说法。令获胜益。岂仅今世亲恩得报。即累世父母之恩。咸蒙报答矣。夫此出家者。诂非其为孝也大矣哉。综观我佛。一生事迹。唯以大觉利生。牺牲一己之富贵利乐。以身作则。不贪王位。不执家庭。化小我而成大我。天下为公。舍苦因令种乐因。平等解脱。其心理革命之伟大精神。报答亲恩之无上大孝。非佛陀者。其谁能为之乎。圆瑛五龄椿萱失荫。幼业儒。冠学佛。先习禅宗八载。次复研究教乘。三十一岁开座讲经。思亲恩之难报。羨大孝如目连。是以欲追先哲。略尽孝思。常於每年七月十四十五十六日。佛欢喜日。僧自恣时。宣讲盂兰盆经。勤修兰盆妙供。集众讽诵经文。仰仗佛僧之威神。俾令亲恩而度脱。今特编辑是经讲义。藉兹文字。提倡孝思。所愿见闻随喜。共修孝行於今生。信解受持。同报亲恩於后世。更望翻印流通。以广法施。是为序。

民国三十八年六月十九日圆瑛弘悟序於圆明讲堂

佛说盂兰盆经讲义

上海圆明讲堂圆瑛弘悟著

今讲此经。略开七门。一总释经题。二启教因缘。三藏乘所摄。四辨定宗旨。五显明力用。六前后三译。七讲解文义。

甲一总释经题

题为经中之总纲。经是题中之别义。总纲若明。别义自易了解。如提纲。则网目自张。揭领。则衣襟自直。故今先释经题。佛是能说之人。盂兰盆是所说之法。此五字是别题。与诸经之名。差别不同故。下经字是通题。经藏诸部。通名为经故。是题中。有人法通别二对。须先知之。次讲题中之义。

佛称能说之人。以佛非天生自然之佛。乃是人道修成之佛。一切众生。本来是佛。只因迷昧而为众生。若能返迷归悟。从本觉理。起始觉智。觉至心源。究竟清净。即名成佛。佛者觉也。乃是大觉悟之人。

佛乃三觉圆满。方得称佛。一自觉。觉悟心即是佛。寂湛常恒。灵明洞彻故。二觉他。觉悟一切众生。返妄归真。信解修证故。三觉满。惑净智圆。自觉智满则慧足。经三祇劫。觉他行满则福足。三觉圆。万德具。两足尊。乃称为佛。今说此经之佛。是释迦牟尼佛。果上说法利生也。

说者宣说。佛以八音四辩。观机施教。对众宣扬。欲启大众之孝心也。

盂兰是印度之语。此译倒悬。盆乃华夏之音。是为

供器。七月十四。十五。十六。僧自恣日。佛令盆罗百味。奉供三尊。仗圣众之威神。拔饿鬼之痛苦。如救倒悬之急。即以是义。而立经题。

经者。梵语修多罗。此云契经。谓契理契机之教。上契诸佛所说之理。下契众生可度之机。此方圣教。亦称为经。本经即佛门之孝经也。上通别合解。一总释经题竟。

甲二启教因缘

法不孤起。起必有因。不有因缘。无由垂范。我佛欲启发人道孝心。乃因大目犍连。为报亲恩。出家修道。始得六通。观见亡母。堕饿鬼中。自力不能救母倒悬。驰还白佛。求佛救度。故为说修设盂兰盆供。可以救度。七世父母。大目犍连。由孝其亲。欲利一切。故与道俗弟子。请佛留此法门。为此经发起之因缘。二启教因缘竟。

甲三藏乘所摄。

因缘既明。未知藏乘。何所摄属。藏有三藏。一修多罗即经藏。此云契经。乃因机设教。犹如对症施方。教必契机。多诠定学。故经为定学之藏。二毗奈耶即律藏。此云调伏。调谓调练三业。伏谓制伏过非。律为戒学之藏。三阿毗昙即论藏。此云对法。法谓涅槃四谛。能对即无漏观慧。论为慧学之藏。

此经佛说救倒悬之法。即契机之教。属经藏所摄。若约宣扬孝道。属律藏所摄。律诠德行。孝为百行之源。儒教孝经开宗明义章中。标为至德要道。而我佛初成正觉。演大华严继说梵网。初结菩萨波罗提木叉大乘戒法。孝顺父母师僧三宝。孝顺至道之法与孔圣所云。至德要

道。若合符节。孝名为戒。故亦属律藏所摄。

乘有五乘。一人天乘。修五戒十善法。二声闻乘。修四谛法。苦集灭道。厌苦断集。慕灭修道。是也。三缘觉乘。观察十二因缘法。流转门。惑。业。苦。三世因果。迁流轮转。生死不息。还灭门。还复真谛。灭除生死。四菩萨乘。修六度法。布施度悭贪。持戒度诸恶。忍辱度瞋恨。精进度懈怠。禅定度散乱。智慧度愚痴。以此六法。自度度人。五佛乘。修一心之法。圆悟万法。不出一心。心生万法。万法唯心。证此一心。成无上道。本经孝顺父母。似惟属人乘所摄。若约孝顺多生父母。以及自行化他。同修孝道。广报亲恩。亦属菩萨乘摄。三藏乘所摄竟。

甲四辨定宗旨

藏乘摄属既定。未识何为宗旨。此经。以孝顺报恩为宗旨。孝为人生之本。哀哀父母。生我劬劳。罔极深恩。理宜报答。人若不孝。则为忘本。君子务本。本立而道生。故孝冠百行之先。

涅槃经云。奇哉父母。生育我等。受大苦恼。满足十月。怀抱我身。既生之后。推乾就湿。除去不净。大小便利。乳哺长养。将护我身。以是义故。当须报恩。随顺供养。

孝顺报恩。乃为二事。如孟宗哭竹生笋。虽为孝顺。但能养口体。即此未必可为报恩。为人子者。父母生前。既能养其口体。复能养其心志。可称孝顺。父母死后。复能度其神识。方是报恩。如地藏菩萨。前身之为婆罗门女。能度亲灵。脱离苦趣。是为孝顺报恩。四辨定宗旨竟。

甲五显明力用

宗旨已定。未审有何力用。力者功力。用者德用。力用即功德之别称。本经佛说僧自恣日。令设盂兰盆供。奉供三尊。圣众之道。其德汪洋。仗其威光道力。可以超度七世父母六亲眷属。脱恶趣之沉沦。解倒悬之痛苦。如大目犍连。依教修斋。能救生母。脱饿鬼之饥虚。即生善道。其力用。岂思议之所能及哉。五显明力用竟。

甲六前后三译

此经共有三译。一晋武帝时。刹法师所译。名盂兰盆经。二惠帝时。法炬法师译云灌腊经。取文中。具饭百味五果。汲灌盆器等意。以立其名。三旧本别录。又一师译为报恩经。此约所行之行以立名。三经重沓。时所宗尚。多弘初译。今所讲解。即刹法师译本。六三译前后竟。

甲七别解文义分三

乙初序分。二正宗分。三通流分。此三分之分。始於道安法师。证於亲光菩萨佛地论。初教起因缘分。二圣教所说分。三信受奉行分。弥天高判。冥符西域。今古同遵。序分分二。丙初证信序 二发起序。今初证信序。具足信。闻。时。主。处。众。六缘成就。证明是法。为佛所说。乃可深信。故曰证信序。

闻如是。一时佛在舍卫国。祇树给孤独园。

此即六成就中前五。诸经皆云。如是我闻。一时佛在某处。与若干大众俱。六缘具足。大教当宣。成就法益。故云成就。通於诸经皆有。又称通序。诸经皆如是

在先。闻则次之。此经以闻在先者。乃随译人意耳。今经阙一列众。义必有之。是文之略也。观后流通分末云。时目连比丘。四辈弟子。欢喜奉行。可证六缘成就。

又名经后序。是结集者。依佛嘱所安。佛临涅槃。阿难悲哀痛哭。阿那律陀。谓阿难言。汝是持佛法人。当以大事问佛。哭将何用。乃教问四事。一佛灭后。我等依何而住。答依四念处住。念是能观之智。处是所观之境。一观身不净。二观受是苦。三观心无常。四观法无我。是依法住。二佛灭后。我等依谁为师。答依戒为师。三恶性比丘。如何治之。答默而摈之。四结集经时。一切经首。当安何语。答如是我闻一时佛在某处。与若干大众俱。此是佛意命安。故诸经皆有。

闻。即阿难由耳根。发耳识。亲闻如来。面命耳提。一堂授受。非辗转传闻也。世人都说肉耳能闻。不知肉耳是色法。色法则不能闻。若此耳能闻。则人死耳根犹存。何以不闻。眼根等亦复如是。必定耳识与根性。方能有闻。此即闻成就。

如是指法之辞。即指此一卷孟兰盆经。孝顺报恩之法。是事可信。故云如是。此即信成就。又阿难结集之时。大众要求云。如尊者所闻。当如是说。阿难答云。如是当说。如我所闻。故曰闻如是。

一时者。不有良时。安成嘉会。即师资道合。一堂晤对。说听终竟。谓之一时。此即时成就。佛在。佛即娑婆教主。释迦牟尼佛。佛有三身。一法身佛。法身清净。犹若虚空。无在无所不在。二报身佛。住莲华藏世界。为诸菩萨。说大乘法。三应身佛。乃应机示现之

身。住凡圣同居土。为说法主。此即主成就。

舍卫国。乃侨萨罗国。都城之名。即波斯匿王所都。因有南侨萨罗国同名。故匿王以舍卫为国名。以简别之。梵语舍卫。此译丰德。国中富有财宝。五欲色声香味触五尘欲境胜炽盛。人多多闻解脱之者。有解丰德之名。谓国丰四德。余以为多闻解脱。可以称德。而财宝五欲。不足以德称。故将丰德。分而释之。以国有财宝五欲之丰。人有多闻解脱之德。

祇树给孤独园者。祇是祇陀太子。树即太子所施之树。给孤独。乃须达多长者之善名。长者为匿王大臣。财富无量。好行惠施。常以财物。周给孤独。幼而无父曰孤。老而无子曰独。故人称为给孤独长者。以金砖布地。买太子花园。起建讲堂精舍。供养佛僧。德感太子。共施园树。故俱留名。此即处成就。

众成就。文虽略而义必具。前已举流通分为证。六缘具足成就。初证信序竟。

丙二发起序。亦名别序。与诸经发起因缘。各别不同故。又称经前序。乃说经之前。由此因缘故。分为四科。

丁一得通报恩 二乘通觅母 三悲堕救济 四难转定业 今初。

大目犍连。始得六通。

大目犍连。此云大采菽氏。姓也。以其先世祖宗。入山修道。常以篆豆为食。菽即豆也。然后得道。因是命族。其族出家者多人。大目犍连神通第一。加大字以别其余也。本名拘律陀。是树名。父母祷此树而生故。

即以树为名。是王舍城宰辅之子。先从沙然梵志学道。与舍利弗为师兄弟。沙然去世。闻佛因缘之教。悟明佛法。同舍利。随佛出家。目连本为欲报亲恩。出家修道。依四谛法。断惑证真。成阿罗汉。

始得六通者。破我执。证我空。即得六种神通。此是修得通。非同天及鬼神之报得通。罗汉多一漏尽通。故能了生死出三界。所以异於报得五通。亦复超胜。一天眼通。能见远近诸色。不独观障内之色。乃至墙壁大山。皆不能为障。悉皆澈见。二天耳通。上穷有顶之天。下极风轮之际。一切诸声。悉皆得闻。三他心通。一切他人心念。或定或散。有漏无漏。悉皆得知。四宿命通。能知宿世。受报好丑。善恶业缘等事。五神足通亦名如意通。无论远近。能如其意。欲到即到。不踰顷刻。六漏尽通。三界之内。欲漏。有漏。无明漏。诸漏已尽。不受后有。是谓六通。神妙莫测通达无碍也。

始得云者。目连本为报恩出家。未得道果。欲报无由。故始得六通。即思寻觅父母。报答深恩。

欲度父母。报乳哺之恩。

度者。度脱。若不能度脱父母神识。离苦得乐。非真报亲恩。夫人之四大幻质。本属无常。有生必灭。当以神识为主。依善恶业。受苦乐报。皆神识也。

目连欲度本生父母。此句。总指二亲。下句。别指母恩更重。虽秉质陶形。恩由父母。而十月怀胎。三年乳哺。全由母亲。故目连更思报乳哺之恩。乳是母亲。全身血液所成。以自己之身分养儿子之躯。命稍长则嚼饭喂婴。吐哺於儿之口。念念关心。时时注意。咽苦吐

甘。其恩德岂有穷极哉。故目连得通。即欲报恩。初得通报恩竟。

丁二乘通觅母

即以道眼。观视_{看也}世间。见其亡母。生饿鬼中。不见饮食。皮骨连立。

道眼。由修道所得之天眼。故曰道眼。目连始得六通。即欲乘神通力。寻觅父母。神识落在何处。即以、与始得相照应。以者用也。即时用天眼通。观看情器二世间。见其父生乐处。不劳救济。见其亡母生饿鬼道中。不闻浆水之名。常受饥虚之苦。故曰不见饮食。饥火交然。身形丑恶。肌肉烧尽。皮骨连立。口吐火焰。顶发烟生。此种苦报。皆由恶业所感召。自业所感还自来受。

饿鬼是恶道之一。造上品恶业堕地狱。造中品恶业堕饿鬼。造下品恶业堕畜生。有经说。定光佛时。目连名罗卜。母字青提。罗卜有事当行。谓其母曰。若有客来。娘当具膳。去后客至。母乃不供。仍更诈为设食之筵。儿归问曰。昨日客来。若为备拟。母曰汝岂不见设食处耶。从此五百生中。悭吝相续。目连与母。宿缘未尽。复为母子。其母悭习仍在。故复造业。堕饿鬼道中。

准正理论。鬼本住在此洲之下。五百由旬。纵广_{纵即直度广即横度亦尔。直横亦五百由旬有琰魔罗界。一云鬼趣。}在南赡部洲。四边直下等。从此展转。散趣余方。以人间一月为一日。乘此积月积年。寿五百岁。